

Pregled Dokumentata | Broj 73/24

Početna (/) / Dokumenti (/Docs/) / Službene novine Federacije BiH (/Docs/Drzavni) / Dokumenti pregled

Službene novine Federacije BiH, broj 73/24

Na osnovu člana 59. stav (3) Zakona o liječenju neplodnosti biomedicinski potpomognutom oplodnjom ("Službene novine Federacije BiH", br. 59/18 i 44/22) na prijedlog Komisije za primjenu postupaka biomedicinski potpomognute oplodnje i Zavoda zdravstvenog osiguranja i reosiguranja Federacije Bosne i Hercegovine, federalni ministar zdravstva donosi

PRAVILNIK

O OBIMU PRAVA NA BIOMEDICINSKI POTPOMOGNUTU OPLODNJU IZ SREDSTAVA BUDŽETA FEDERACIJE BOSNE I HERCEGOVINE, NAČIN FORMIRANJA CIJENE POJEDINAČNIH POSTUPAKA BIOMEDICINSKI POTPOMOGNUTE OPLODNJE, KRITERIJI I NAČINI UGOVARANJA, KAO I DRUGA PITANJA OD ZNAČAJA ZA PROVOĐENJE BIOMEDICINSKI POTPOMOGNUTE OPLODNJE

POGLAVLJE I. - OPĆA ODREDBA

Član 1. (Predmet)

Ovim pravilnikom se uređuju obim prava na biomedicinski potpomognutu oplodnju iz sredstava budžeta Federacije Bosne i Hercegovine (u daljnjem tekstu: Federacija), način formiranja cijene pojedinačnih postupaka biomedicinski potpomognute oplodnje, kriteriji i načini ugovaranja, kao i druga pitanja od značaja za provođenje biomedicinski potpomognute oplodnje.

POGLAVLJE II. - OSTVARIVANJE PRAVA NA BIOMEDICINSKI POTPOMOGNUTU OPLODNJU

Član 2. (Pravo na biomedicinski potpomognutu oplodnju)

(1) Pravo na biomedicinski potpomognutu oplodnju (u daljnjem tekstu: BMPO) iz sredstava budžeta Federacije, na osnovu odluke Vlade Federacije Bosne i Hercegovine o usvajanju "Transfera Vlade Federacije Bosne i Hercegovine za finansiranje biomedicinski potpomognute oplodnje (u daljnjem tekstu: budžet Federacije), uz ispunjavanje uvjeta iz čl. 21. i 22. Zakona o liječenju neplodnosti biomedicinski potpomognutom oplodnjom ("Službene novine Federacije BiH", br. 59/18 i 44/22 - u daljnjem tekstu: Zakon) imaju punoljetni i poslovno sposobni žena i muškarac, kao i osobe ograničene poslovne sposobnosti u skladu s odredbom stava (3) člana 28. Zakona, koji su u braku, odnosno u vanbračnoj zajednici i koji su u dobi koja omogućava obavljanje roditeljskih dužnosti, podizanje, odgoj i osposobljavanje djeteta za samostalan život, te uz kumulativno ispunjavanje sljedećih uvjeta:

a) nalazi doktora medicine specijaliste ginekologije i akušerstva, kojim se potvrđuje:

- da su provedeni postupci utvrđivanja uzroka neplodnosti ili smanjenja plodnosti u skladu sa Smjernicama za liječenje neplodnosti (u daljnjem tekstu: Smjernice) donesenim na osnovu člana 23. stav (3) Zakona,

- da postoje indikacije za BMPO u skladu sa Smjericama,
 - da su iscrpljene sve druge mogućnosti liječenja neplodnosti, ili kada hirurška, medikamentozna ili kombinirana terapija nije moguća ili nije uspješna, a u skladu sa Smjericama i uz odgovarajuću dokumentaciju koja to dokazuje,
 - da je provedeno liječenje parova u skladu sa Smjericama,
 - da su partneri informirani o BMPO u skladu sa članom 32. Zakona;
- b) da je obavljeno testiranje u partnerskoj donaciji u skladu sa Smjericama, i to: anti-HIV-1 i anti-HIV-2, HbsAg i anti-HBc, anti-HCV (antitijela na hepatitis C) i sifilis - specifični ili nespecifični treponema test - laboratorijski nalaz;
- c) da je žena u dobi do navršene 42. godine života - kopija lične karte i
- d) izjava para o odabiru ovlaštene ugovorne zdravstvene ustanove za obavljanje BMPO u skladu sa stavom (2) člana 5. ovog pravilnika.

(2) Izuzetno od stava (1) tačka c) ovog člana, na prijedlog stručnog konzilija zdravstvene ustanove u kojoj se liječe bračni, odnosno vanbračni drugovi, a iz opravdanih zdravstvenih razloga, može se dati saglasnost na BMPO i ženi nakon navršene 42. godine života, a u skladu sa Smjericama.

Član 3.

(Saglasnost Zavoda zdravstvenog osiguranja i reosiguranja Federacije Bosne i Hercegovine)

- (1) Pravo na BMPO iz člana 2. ovog pravilnika ostvaruje se na osnovu izdate saglasnosti Komisije za izdavanje pojedinačnih saglasnosti za obavljanje biomedicinski potpomognute oplodnje (u daljnjem tekstu: Komisija za BMPO) koju formira Zavod zdravstvenog osiguranja i reosiguranja Federacije Bosne i Hercegovine (u daljnjem tekstu: Federalni zavod), i to iz reda stručnjaka iz ove oblasti sa područja Federacije.
- (2) Komisija za BMPO Federalnog zavoda iz stava (1) ovog člana sastoji se od najmanje tri člana koji se biraju iz reda doktora medicine specijalista ginekologije i akušerstva, i to u rangu subspecijaliste iz humane reprodukcije ili specijalista ginekologije i akušerstva sa najmanje pet godina iskustva u reproduktivnoj medicini ili iz reda doktora medicine specijalista ginekologije i akušerstva sa 10 godina specijalističkog staža.
- (3) Predsjednik Komisije za BMPO Federalnog zavoda je doktor medicine specijalista ginekologije i akušerstva subspecijalista iz humane reprodukcije ili specijalista ginekologije i akušerstva sa najmanje pet godina iskustva u reproduktivnoj medicini.
- (4) Članovi Komisije iz stava (3) ovog člana imaju i svoje zamjenske članove.
- (5) Federalni zavod donosi bliže uputstvo o radu Komisije iz stava (1) ovog člana.

Član 4.

(Važenje saglasnosti)

- (1) Saglasnost iz člana 3. ovog pravilnika se izdaje na zahtjev bračnog, odnosno vanbračnog para iz člana 2. ovog pravilnika.
- (2) Saglasnost iz stava (1) ovog člana izdaje se za svaki pokušaj posebno i važi najduže 12 mjeseci od dana izdavanja. Navedeni rok je rok u kojem je potrebno započeti postupak BMPO.
- (3) Izuzetno od stava (2) ovog člana, za tri pokušaja intrauterine inseminacije može se izdati jedna saglasnost.
- (4) Ukoliko parovi nisu ostvarili svoje pravo na BMPO na osnovu izdate saglasnosti iz st. (2) i (3) ovog člana, i to iz

opravdanih razloga, mogu podnijeti novi zahtjev uz obrazloženje razloga.

(5) Uz zahtjev parovi prilažu dokumentaciju kojom dokazuju ispunjenost uvjeta iz stava (1) člana 2. ovog pravilnika, te dokaz o bračnoj, odnosno vanbračnoj zajednici u skladu sa članom 31. Zakona.

Član 5. (Ostvarivanje prava u ovlašćenoj zdravstvenoj ustanovi)

(1) Na osnovu izdate saglasnosti Federalnog zavoda bračni, odnosno vanbračni parovi ostvaruju pravo na postupak BMPO u zdravstvenoj ustanovi koja ima važeće rješenje federalnog ministra zdravstva za obavljanje BMPO na području Federacije Bosne i Hercegovine (ovlašćena zdravstvena ustanova) u skladu sa Zakonom i s kojom Federalni zavod ima sklopljen ugovor za pružanje usluga BMPO.

(2) Bračni, odnosno vanbračni parovi imaju pravo izbora ovlašćene ugovorne zdravstvene ustanove za obavljanje BMPO, a prema listi ovlašćenih ugovornih zdravstvenih ustanova koja se objavljuje na internet stranici Federalnog zavoda, o čemu prilažu izjavu koja čini sastavni dio obavezne dokumentacije iz člana 2. ovog pravilnika.

Član 6. (Osiguranje sredstava za BMPO)

(1) Federalni zavod dužan je na godišnjem nivou planirati sredstva za BMPO, uvažavajući obim prava na BMPO utvrđen ovim pravilnikom.

(2) Ukoliko postoji veći broj zahtjeva nego što je to planirano na godišnjem nivou budžetom Federacije i finansijskim planom Federalnog zavoda parovi se stavljaju na listu čekanja, pri čemu treba voditi računa o starosnoj dobi žene i onkološkim bolesnicima, kao i parovima koji nisu ostvarili ovo pravo iz sredstava zdravstvenog osiguranja u prethodnom periodu do dana stupanja na snagu ovog pravilnika.

(3) Kriterije i način stavljanja na listu čekanja utvrđuje Federalni zavod, u skladu sa Zakonom o zdravstvenom osiguranju ("Službene novine Federacije BiH", br. 30/97, 7/02, 70/08, 48/11, 36/18 i 61/22) i propisima donesenim na osnovu tog zakona, uz konsultacije sa Komisijom za primjenu postupaka biomedicinski potpomognute oplodnje Federalnog ministarstva zdravstva.

POGLAVLJE III. - OBIM PRAVA NA BIOMEDICINSKI POTPOMOGNUTU OPLODNJU

Član 7. (Obim prava na BMPO na teret sredstava budžeta Federacije)

(1) Pravo na liječenje putem BMPO na teret sredstava budžeta Federacije, u pravilu, ima žena do navršene 42. godine života, koja je u braku, odnosno vanbračnoj zajednici, i to u sljedećem obimu:

a) tri pokušaja intrauterine inseminacije, u skladu sa medicinskim indikacijama i smjernicama za liječenje u iznosu od 100% cijene utvrđene u Cjenovniku zdravstvenih usluga koje se finansiraju sredstvima fonda solidarnosti (u daljnjem tekstu: Cjenovnik);

b) pet pokušaja vantjelesne oplodnje, i to:

- prvi pokušaj iz stava (2) ovog člana se finansira u iznosu od 100% cijene utvrđene u Cjenovniku,

- svaki naredni pokušaj finansira se u iznosu od 50% cijene utvrđene u Cjenovniku,

c) pohranjivanje preostalih spolnih ćelija, spolnih tkiva i embriona finansira se za kalendarsku godinu po pacijentu za svaki pokušaj za period pohrane i u iznosu od 100% cijene utvrđene u Cjenovniku, i to najviše pet godina;

d) pohranjivanje spolnih ćelija, spolnih tkiva i embriona u slučajevima kada postoji opasnost od neplodnosti (onkofertilitet i druga oboljenja) finansira se po pacijentu za period pohrane u iznosu od 100% cijene utvrđene u Cjenovniku, i to do navršene 42. godine života (žena), odnosno do navršenih 50 godina života (muškarac) u skladu sa članom 51. Zakona, a na osnovu saglasnosti Komisije za primjenu postupaka biomedicinski potpomognute oplodnje Federalnog ministarstva zdravstva koja se izdaje na period od najviše pet godina.

(2) Pokušaj u smislu ovog pravilnika podrazumijeva stimulaciju jajnika, punkciju i aspiraciju, vantjelesnu oplodnju, kultivaciju, embriotransfer svježeg embriona, kriopohranu embriona, te sukcesivne embriotransfere odmrznutih embriona koji su prethodno zamrznuti, a rezultirali su procedurom vantjelesne oplodnje.

POGLAVLJE IV. - NAČIN FORMIRANJA CIJENE POJEDINAČNIH POSTUPAKA BIOMEDICINSKI POTPOMOGNUTE OPLODNJE, KRITERIJI I NAČINI UGOVARANJA

Član 8.

(Cijena pojedinačnih postupaka BMPO)

(1) Cijena usluge BMPO utvrđuje se na osnovu propisanih postupaka neophodnih za izvršenje kompletne usluge, shodno Zakonu i Smjernicama.

(2) Cijene pojedinačnih postupaka BMPO utvrđuju se na način da se za svaki postupak iskazuju prosječni troškovi.

(3) Prosječni troškovi se utvrđuju na bazi standardiziranih radnih timova, vremena potrebnog za pružanje usluge, standardiziranog prostora, opreme i materijala koji se koristi prilikom pružanja usluge.

(4) U cijenu pojedinačnih postupaka kalkuliраju se slijedeći troškovi:

a) troškovi rada;

b) troškovi lijekova, potrošnog medicinskog i ostalog medicinskog materijala, kao i medijuma;

c) troškovi amortizacije prostora i opreme;

d) troškovi investicijskog i tekućeg održavanja;

e) režijski i ostali troškovi poslovanja.

(5) Troškovi lijekova za stimulaciju ovulacije obračunavaju se odvojeno od cijene pojedinačnih postupaka iz stava (4) ovog člana.

(6) Troškove lijekova za stimulaciju ovulacije finansira/sufinansira Federalni zavod ovlašćenoj zdravstvenoj ustanovi u skladu sa Pravilnikom o uvjetima u pogledu prostora, opreme i kadra za čuvanje i primjenu svih vrsta lijekova koji se upotrebljavaju u zdravstvenim ustanovama ("Službene novine Federacije BiH", broj 28/18) ili podnosiocu zahtjeva iz stava (1) člana 2. ovog pravilnika, i to iz sredstava budžeta Federacije i u procentu finansiranja kako je utvrđeno po pojedinoj vrsti postupka u članu 7. ovog pravilnika.

(7) Komisija za primjenu postupaka biomedicinski potpomognute oplodnje Federalnog ministarstva zdravstva jednom godišnje, a po potrebi i češće najkasnije do 30. januara, utvrđuje vrstu generičkih lijekova za stimulaciju ovulacije koji se koriste u BMPO, a u cilju provođenja st. (5) i (6) ovog člana.

Član 9.

(Cijene za postupke BMPO)

Cijene za BMPO utvrđuje Federalni zavod u Cjenovniku, a u skladu sa propisima u oblasti zdravstva, i to za slijedeće postupke BMPO:

a) intrauterina inseminacija (IUI),

b) vantjelesna oplodnja (klasični IVF):

- stimulacija jajnika (ultrazvučni pregledi i ordiniranje terapije),
- punkcija i aspiracija (punkcija, aspiracija i izolacija kumulusa),
- vantjelesna oplodnja,
- kultivacija embriona (u laboratorijskim uvjetima do D3),
- kultivacija embriona (do laboratorijskim uvjetima D5/6),
- embriotransfer (svježi embriotransfer),
- kriopohrana embriona,
- čuvanje zamrznutog biološkog materijala (spolnih ćelija, spolnih tkiva i embriona) za jednu godinu,
- embriotransfer zamrznutog embriona (fET).

c) vantjelesna oplodnja (ICSI):

- stimulacija jajnika (ultrazvučni pregledi i ordiniranje terapije),
- punkcija i aspiracija (punkcija, aspiracija i izolacija kumulusa),
- vantjelesna oplodnja,
- kultivacija embriona (u laboratorijskim uvjetima do D3),
- kultivacija embriona (do laboratorijskim uvjetima D5/6),
- embriotransfer (svježi embriotransfer),
- kriopohrana embriona,
- čuvanje zamrznutog biološkog materijala (spolnih ćelija, spolnih tkiva i embriona) za jednu godinu,
- embriotransfer zamrznutog embriona (fET).

d) kriopohrana spolnih ćelija, spolnih tkiva i embriona u slučajevima kada postoji opasnost od neplodnosti (onkofertilitet i druga oboljenja),

e) pravno savjetovanje u postupcima navedenim pod tač. a), b) i c) ovog člana.

Član 10.

(Troškovi koji se ne kalkulišu u cijenu BMPO)

U cijenu usluge BMPO se ne kalkulišu troškovi za usluge dijagnostike, laboratorije, savjetovanja i dr. koje prethode neposrednim postupcima BMPO, a koje pružaju zdravstvene ustanove u okviru ugovorenog programa zdravstvene zaštite

sa nadležnim kantonalnim zavodima zdravstvenog osiguranja.

Član 11. (Način ugovaranja)

(1) Federalni zavod ugovara pružanje usluga BMPO sa zdravstvenim ustanovama za obavljanje BMPO ovlaštenim u skladu sa Zakonom, a nakon provedenog postupka saglasno Zakonu o javnim nabavkama ("Službeni glasnik BiH", br. 39/14, 59/22 i 50/24) i propisima donesenim na osnovu tog zakona.

(2) Lista ovlaštenih ugovornih zdravstvenih ustanova za BMPO za svaku fiskalnu godinu objavljuje se na internet stranici Federalnog zavoda.

Član 12. (Nadoknada troškova liječenja)

Podnositelji zahtjeva koji su liječeni biomedicinski potpomognutom oplodnjom bez prethodne saglasnosti Komisije za BMPO Federalnog zavoda iz člana 3. ovog pravilnika nemaju pravo na nadoknadu troškova liječenja iz sredstava budžeta Federacije Bosne i Hercegovine.

POGLAVLJE V. - PRELAZNE I ZAVRŠNE ODREDBE

Član 13. (Rješavanje ranije podnesenih zahtjeva za nadoknadu troškova liječenja)

Zahtjevi za naknadu troškova liječenja iz sredstava budžeta Federacije koji su podneseni Federalnom zavodu kao izuzeće od redovnog postupanja, do dana stupanja na snagu ovog pravilnika, a na osnovu člana 11a. stav (2) Pravilnika o izmjeni i dopuni Pravilnika o obimu prava na biomedicinski potpomognutu oplodnju iz sredstava budžeta Federacije Bosne i Hercegovine, način formiranja cijene pojedinačnih postupaka biomedicinski potpomognute oplodnje, kriteriji i načini ugovaranja, kao i druga pitanja od značaja za provođenje biomedicinski potpomognute oplodnje ("Službene novine Federacije BiH", broj 99/23), riješit će se u skladu sa raspoloživim sredstvima predviđenim Finansijskim planom Federalnog zavoda za 2024. godinu.

Član 14. (Rok za donošenje bližeg uputstva od strane Federalnog zavoda)

(1) Federalni zavod je dužan u roku od 30 dana od dana stupanja na snagu ovog pravilnika da donese bliže uputstvo o radu Komisije za BMPO tog zavoda usklađeno s odredbama ovog pravilnika.

(2) Federalni zavod, uz konsultacije sa Komisije za primjenu postupaka biomedicinski potpomognute oplodnje Federalnog ministarstva zdravstva, je dužan u roku od 60 dana od dana stupanja na snagu ovog pravilnika da uredi kriterije i način stavljanja na listu čekanja.

(3) Federalni zavod listu čekanja iz stava (2) ovog člana vodi u skladu sa propisima o zaštiti ličnih podataka.

Član 15. (Pohranjivanje spolnih ćelija, tkiva i embriona)

(1) Odlučivanje o dugotrajnoj pohrani spolnih ćelija, tkiva i embriona zbog opasnosti od neplodnosti je u nadležnosti Komisije za primjenu postupaka biomedicinski potpomognute oplodnje Federalnog ministarstva zdravstva.

(2) Usluga dugotrajne pohrane spolnih ćelija, tkiva i embriona zbog opasnosti od neplodnosti se finansira iz sredstava budžeta Federacije pružena kod ovlaštenih javnih zdravstvenih ustanova na osnovu izdatog računa i saglasnosti o

dugotrajnoj pohrani spolnih ćelija, tkiva i embriona zbog opasnosti od neplodnosti Komisije za primjenu postupaka biomedicinski potpomognute oplodnje Federalnog ministarstva zdravstva.

Član 16.
(Prelazne i završne odredbe)

Danom stupanja na snagu ovog pravilnika prestaje da važi Pravilnik o obimu prava na biomedicinski potpomognutu oplodnju iz sredstava budžeta Federacije Bosne i Hercegovine, način formiranja cijene pojedinačnih postupaka biomedicinski potpomognute oplodnje, kriteriji i načini ugovaranja, kao i druga pitanja od značaja za provođenje biomedicinski potpomognute oplodnje ("Službene novine Federacije BiH", br. 4/23, 26/23 i 99/23).

Član 17.
(Stupanje na snagu pravilnika)

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 02-02-4009-1/24
11. septembra 2024. godine
Sarajevo

Ministar
Dr. **Nediljko Rimac**, s. r.

Hvala što ste naš pretplatnik. Koristite pogodnosti koje dobijate pretplatom.

O nama

Javno preduzeće Novinsko-izdavačka organizacija SLUŽBENI LIST BOSNE I HERCEGOVINE. Sva prava pridržana. 2014

Adresa

Džemala Bijedića 39/III
71000 Sarajevo
Bosna i Hercegovina
Email: sllist@sllist.ba (mailto:sllist@sllist.ba)

Kontakti

Centrala

Tel: 033/722-030

Email (mailto:info@sllist.ba)